

Na osnovu člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07 i 94/07), Vijeće ministara Bosne i Hercegovine, na 36. sjednici, održanoj 24.01. 2008. godine, donijelo je

**O D L U K U**  
**O NAČINU PREDLAGANJA PREDSTAVNIKA IZ BOSNE I HERCEGOVINE U**  
**KOMITETE, ODBORE I DRUGA MEĐUNARODNA TIJELA ZA LJUDSKA PRAVA**

**Član 1.**  
**(Predmet odluke)**

Ovom odlukom utvrđuje se način predlaganja predstavnika iz Bosne i Hercegovine, kao nezavisnih eksperata iz država-članica, u komitete, odbore i druga međunarodna tijela za ljudska prava.

**Član 2.**  
**(Kriteriji i uslovi za kandidate)**

(1) Lista kandidata predstavnika iz Bosne i Hercegovine utvrđuje se na osnovu javnog poziva koji sadrži uslove i kriterije koje propisuju nadležni komiteti, odbori i druga međunarodna tijela za ljudska prava, odnosno koji su sadržani u propisima pojedinih međunarodnih konvencija.

(2) Ministarstvo za ljudska prava i izbjeglice BiH (u daljem tekstu Ministarstvo) će javne pozive realizovati putem elektronskih i printanih medija.

(3) Pored kriterija koje propisuju nadležni komiteti, odbori i druga međunarodna tijela za ljudska prava, kandidati treba da ispunjavaju sljedeće opće uslove:

- a) da su državljani Bosne i Hercegovine,
- b) da posjeduju odgovarajući stepen obrazovanja (visoka stručna sprema) i odgovarajuće stručno znanje i iskustvo za pravilno vršenje funkcije
- c) da se na kandidate ne odnosi član IX tačka 1. Ustava Bosne i Hercegovine,
- d) da posjeduju priznate kompetencije iz oblasti ljudskih prava, visok moralni ugled, nezavisnost u radu, akademska obrazovanja iz oblasti ljudskih prava, rukovodno iskustvo u oblasti ljudskih prava na državnom, regionalnom ili međunarodnom nivou, poznavanje sistema rada, mandata i politika UN, Vijeća Evrope i drugih međunarodnih tijela za ljudska prava, poznavanje međunarodnih instrumenata iz oblasti ljudskih prava, normi, disciplina, različitih legislativnih sistema i civilizacija, profesionalno znanje jednog od radnih jezika UN-a.

**Član 3.**  
**(Način pripreme prijedloga)**

(1) Prilikom utvrđivanja liste kandidata, primjenom kriterija iz člana 2. ove odluke, Ministarstvo će voditi računa o ravnopravnoj spolnoj, teritorijalnoj i nacionalnoj zastupljenosti kandidata.

(2) Lista treba da sadrži podatke za najmanje tri kandidata, od kojih će jedan biti imenovan u komitete, odbore ili druga međunarodna tijela za ljudska prava.

(3) Listu kandidata, koji će biti predloženi iz Bosne i Hercegovine za članove komiteta, odbora i drugih međunarodnih tijela za ljudska prava, sačinjava Ministarstvo, uz prethodno pribavljeno mišljenje Ministarstva vanjskih poslova BiH, i dostavlja Vijeću ministara BiH na potvrđivanje.

**Član 4.**  
**(Evidencije i prikupljanje aplikacija)**

(1) Ministarstvo će u okviru svoje nadležnosti uspostaviti službene evidencije i prikupljati aplikacije o dosadašnjim i budućim predstavnicima iz Bosne i Hercegovine koji su nominovani ili izabrani u komitete, odbore i druga međunarodna tijela za ljudska prava.

(2) Evidencije iz stava 1. ovog člana sačinjavaju se u saradnji sa Ministarstvom vanjskih poslova BiH.

**Član 5.**  
**(Obavijest o prijedlogu)**

(1) Nakon što Vijeće ministara BiH potvrdi prijedlog Ministarstva, Ministarstvo putem Ministarstva vanjskih poslova BiH listu predloženih kandidata dostavlja nadležnom komitetu, odboru i drugim međunarodnim tijelima za ljudska prava.

(2) Ministarstvo će o nominaciji obavijestiti sve kandidate u roku od 7 dana od dana potvrđivanja liste kandidata od strane Vijeća ministara BiH.

**Član 6.**  
**(Prestanak mandata)**

Ukoliko članu u nekom od međunarodnih tijela za ljudska prava u koje je imenovan prestane članstvo prije isteka mandata ili iz nekog razloga izabrani kandidat ne preuzme dužnost člana u nekom od međunarodnih tijela, Ministarstvo, u cilju efikasnosti, može sa postojeće utvrđene liste predložiti kandidata koji se na listi nalazi na prvom sljedećem mjestu.

**Član 7.**  
**(Prava i obaveze izabranih predstavnika)**

- (1) Kada nadležni komitet, odbor i drugo međunarodno tijelo za ljudska prava imenuju predstavnika iz Bosne i Hercegovina za svog člana, obavijest o imenovanju Ministarstvo dostavlja Vijeću ministara BiH i imenovanom članu ili imenovanim članovima.
- (2) Članovi komiteta, odbora i drugih međunarodnih tijela za ljudska prava mogu biti ponovno izabrani ukoliko je njihovo angažovanje i učešće u radu navedenih tijela uspješno ocijenjeno od strane tijela u kojima je bio imenovan.
- (3) Imenovani član komiteta, odbora i drugih međunarodnih tijela za ljudska prava iz Bosne i Hercegovine može zatražiti konsultacije o određenim pitanjima od nadležnih institucija Bosne i Hercegovine koja su od interesa za Bosnu i Hercegovinu.
- (4) Članovi komiteta, odbora i drugih međunarodnih tijela za ljudska prava, će najmanje jednom godišnje dostaviti obavještenje o učešću u radu međunarodnih tijela za ljudska prava i zapažanjima iz rada komiteta, odbora i drugih međunarodnih tijela za ljudska prava, koji su od interesa za Bosnu i Hercegovinu.
- (5) Ministarstvo će jednom godišnje informisati Vijeće ministara BiH o zapažanjima predstavnika iz Bosne i Hercegovine u međunarodnim tijelima za ljudska prava koja su od interesa za Bosnu i Hercegovinu.


**Član 8.**  
**(Stručna i tehnička pomoć)**

- (1) Stručnu i tehničku pomoć imenovanim predstavnicima iz Bosne i Hercegovine pred komitetima, odborima i drugim međunarodnim tijelima za ljudska prava osigurat će Ministarstvo vanjskih poslova BiH.
- (2) U slučaju potrebe imenovani članovi navedeni u stavu 1. ovog člana mogu zatražiti i finansijsku pomoć o čemu će odluku na prijedlog Ministarstva donijeti Vijeće ministara BiH.

**Član 9.**  
**(Stupanje na snagu)**

Ova odluka stupa na snagu danom donošenja i objavljuje se u „Službenom glasniku BiH“.

VM broj 16 /08  
24. 01. 2008. godine  
Sarajevo



Predsjedavajući  
Vijeća ministara BiH  
dr. Nikola Špirić